

# 1 Abhakorinto

<sup>1</sup> Paulo, unu abhilikilwaga na Kristo Yesu kubha mutumwa owe lyenda lya Nyamuanga, na Sosthene muili weswe, <sup>2</sup> kwi kanisa lya Nyamuanga linu lili Korintho, kubhanu bhauhye ku Yesu Kristo, bhanu bhabhilikiwe kubha bhanu bhelu. Echibhandikila bhona bhanu abhalikusha lisina lya Lata Bugenyi weswe Yesu Kristo mbala jona, Latabhugenyi webhwe neswe. <sup>3</sup> Echigongo no mulembe gubhe kwemwe okusoka ku Nyamuanga lata weswe na ku Latabhugenyi weswe Yesu Kristo. <sup>4</sup> Nsiku jona enimusima Nyamuanga wani ingulu yemwe, kwainsonga ye chigongo cha Nyamuanga unu Kristo Yesu abhayanile. <sup>5</sup> Abhakolele kubha bhanibhi ku bhuli njila, kunyaika amwi no bhwengeso bhwona. <sup>6</sup> Abhakolele kubha bhanibhi, lwakutyo obhubhambasi ingulu ya Kristo kutyo obhwolesha echimali agati yemwe. <sup>7</sup> Kulwejo mutakulebhelelwa amabhando ga mumioyo, lwakutyo muli ne lyenda lya kulinda obhusuluko bhwa Latabhugenyi weswe Yesu Kristo. <sup>8</sup> Kabhasimbagilisha emwe okukinga kubhutelo, koleleki musige kubha ne solo kulusiku lwa Latabhugenyi weswe Yesu Kristo. <sup>9</sup> Nyamuanga ni mulengelesi unu abhabhilikiye emwe kubhusangisi bhwo Mwana wae, Yesu Kristo Latabhugenyi weswe. <sup>10</sup> Woli enibhasabhwa abhamula bhasu na bhayala bhasu, okulabhila kwisina lya Latabhugenyi weswe Yesu

Kristo, koleleki bhona mwikilisha, na kutabhamo kwaulana agati yemwe. Enibhasabhwa mugwatane amwi mu kwiganilisha no kulwaja kumwi. <sup>11</sup> Kulwokubha abhanu bha munyumba ya Kloe bhabwiliye bhulimo obh-waulani bhunu obhugendelela amwi mwimwe. <sup>12</sup> Nina insonga inu: Bhuli umwi kwimwe kaikati, “Anye nili wa Paulo, “amwi “Anye liwa Apolo,”amwi ati, Anye nili wa Kefa” amwi ati, Anye nili wa Kristo”. <sup>13</sup> Angu! Kristo agabhanyikene? Angu! Paulo abhambilwe kulwainjuno yemwe? Angu! mwabhatijibhwe kwi Sina lya Paulo? <sup>14</sup> Enimusima Nyamuanga kulwokubha nitamubhatijishe wona wona, tali Krispo na Gayo. <sup>15</sup> Jinu jabhee kutya atalio wona wona unu akaikile ati mwabhatijibhwe kwi sina lyani. <sup>16</sup> (Nalindi nabhatijishe abhamunyumba ya Stephania. Okukila awo, ntakumenyati nabhatijishe munu undi wona wona). <sup>17</sup> Kulwokubha, Kristo atantumile kubhatija tali okulasha emisango jo bhwana. Atantumile okulasha kwe misango kwo bh-wengeso bhwe chinyamubhili, koleleki amanaga go musalabha gwa Kristo gusige kususibhwao. <sup>18</sup> Kulwokubha omusango gwo musalabha ni bhumumu ku bhanu abhafwa. Nawe kubhanu Nyamuanga kakisha, ni managa ga Nyamuanga. <sup>19</sup> Kulwokubha Jandikilwe, “Eninyamula obh-wengeso bhwa bhobhwenge. Eninyamula obh-wiganilisha bhwa abhobhwenge.” <sup>20</sup> Alyaki omunu wo bhwengeso? Alyaki omunu wo bhwenge? Alyaki omwaiki no mukongya we chalo chinu? Angu, Nyamuanga atainduye

obhwengeso bhwa insi inu kubha bhumumu?  
<sup>21</sup> Okwambila insi inu nibha nobhwengeso bhwayo itamumenyele Nyamuanga, jabhee ja bhwana ku Nyamuanga kubhumumu bhwebhwe obhwokulasha koleleki okuchungula bhanu abhekilisha. <sup>22</sup> Ku Bhayahudi abhabhusha ebhijejekanyo bhye bhilugusho na Abhayunani abhayenja obhwengeso. <sup>23</sup> Nawe echimulasha Kristo unu abhambilwe, unu ali chikujulo ku Bhayaudi na nibhumumu ku Bhayunani. <sup>24</sup> Nawe kubhanu bhabhilikiwe na Nyamuanga, Abhayaudi na Bhayunani, echimulasha Kristo lwa amanaga no bhwengeso bhwa Nyamuanga. <sup>25</sup> Kulwokubha obhumumu bhwa Nyamuanga bhuli no bhwengeso okukila obhwomwana munu, no bhulenga bhwa Nyamuanga bhuli na managa okukila obhwomwana munu. <sup>26</sup> Lola okubhilikila kwa Nyamuanga ingulu yemwe, bhamula bhasu na bhayala bhasu. Jitali ati agati yemwe yaliga muli bhengeso mu bhana bhanu. Jitalyati aliga muna amanaga. Jitalyati mwebhuhye mu bhukulu. <sup>27</sup> Nawe Nyamuanga asolele ebhinu ebhimumu ebyakuchalo kunu okubhiswasha ebhyo bwengeso. Nyamuanga asolele chinu chaliga chili chilenga ochiswasha echamanaga. <sup>28</sup> Nyamuanga asolele chinu chaliga chili chemwalo na chinu chagahyaga kuchalo kunu. Asolele nebhinu bhinu bhitalhalwagwa kubha na chibhalo, kwo kubhikola kubhulwa chibhalo ebhinu bhinu bhyaliga bhili ne chibhalo. <sup>29</sup> Akolele kutyo asige kubhao wona wona unu kekuya imbele yae. <sup>30</sup> Kulwa insonga ya chinu Nyamuanga akolele, woli muli munda

ya Kristo Yesu, unu akolelwe kubha mwengeso ingulu yeswe okusoka ku Nyamuanga. Aliga ali chimali cheswe, obhwelu no bhuchungusi. <sup>31</sup> Lwakutyo, lwakutyo amandiko agaika, “Unu kekuya, asige okwikuya ku Latabhugenyi.”

## Isura 2

<sup>1</sup> Anu nejile kwimwe abhamula bhasu na bhayala bhasu, nitejile ku misango jokukongya kogya nobhwengeso lwakutyo nalasishe echimali chinu chiselekele ingulu ya Nyamuanga. <sup>2</sup> Nalamuye okulema omenya chona chona anu aliga niliamwi nemwe tali Yesu Kristo, no mwene unu abhambilwe. <sup>3</sup> Aliga nili amwi nemwe mubhulenga, na mubhubha, na mukuyalala muno. <sup>4</sup> Nokwaika kwani no kusimula kwani kwaliga kutali kwo mukongya no bhwengeso. Tali, galiga gali gokumwolesha Omwoyo na gali na managa, <sup>5</sup> koleleki elikilisha lyemwe litaja kubha ku bhwengeso bhwo mwana munu, tali kumanaga ga Nyamuanga. <sup>6</sup> Woli echiloma obhwengeso amwi ya bhanu bhakulu, tali bhutali bhwengeso bhwe chalo chinu, amwi eya bhatangasha bho mwanya gunu, bhanu abhalabhao. <sup>7</sup> Nawe, echiloma obhwengeso bhwa Nyamuanga muchimali chinu chibhisile, obhwengeso bhunu bhwiselekele inu Nyamuanga asolele kara mumwanya gwa likusho lyeswe. <sup>8</sup> Atalio wona wona mu bhatangasha bho mwanya gunu unu amenyaga obhwengeso bhunu, Bhakabhee nibhaimenya omwanya ogwo, bhatakamubhambile Latabhugenyi wa likusho.

9 Nawe lwakutyo Jandikilwe, “Emisango jinu eliso litajilolele, jitonguhye na matwi, obhwiganilisha bhuteganilishhe, emisango jinu Nyamuanga elabhile ingulu ya bhanu abhamwenda omwene.” 10 Jinu ni misango jinu Nyamuanga ajisuluye kwiswe okulabha ku Mwoyo, Kulwokubha Omwoyo katatilisha bhuli chinu, nolo emisango ja munda ja Nyamuanga. 11 Kulwokubha niga unu kamenya obhwiganilisha bhwo munu, atali omwoyo gwo munu munda yae? Kulwejo kutyo, atalio unu kamenya emisango ja munda ya Nyamuanga, atali Omwoyo gwa Nyamuanga. 12 Nawe chitalamiye omwoyo gwe chalo, nawe Omwoyo gunu gwasokele ku Nyamuanga, koleleki chimenye emisango jinu chiyanibhwe na Nyamuanga. 13 Echaika emisango jinu kwa magambo, ganu kwo bhwengeso bhwo munu bhutakutula kwiigisha. Omwoyo Mwelu kagajula amagambo go mwoyo kwo bhwengeso bhwo mwoyo. 14 Omunu unu atali wechinyamwoyo atakulamila amagambo go Mwoyo Mwelu wa Nyamuanga, kulwokubha ago kumwene ni bhumumu. Atakutula kugamenya kulwokubha agamenywa chinyamwoyo. 15 Ku wechinyamwoyo kalamula misango jona. Nawe kalamulwa na bhandi. 16 “Niga unu katula okumenya obhwiganilisha bhwa Latabhugenyi, unu katula okumwiigisha omwene?” Nawe chili no bhwiganilisha bhwa Kristo.

## Isura 3

1 Nanye, bhamula bhasu na bhayala bhasu,

nitalomele nemwe kuti lwa bhanu bhechinyamwoyo, nawe lwa bhanu bhechinyamubhili. Na lwa bhana bhalela mu Kristo. <sup>2</sup> Nabhanywesishe amata na jitali nyama, kulwokubha aliga mutemaliliye okulya jinyama. Na woli muchali kwimalilila. <sup>3</sup> Kulwokubha emwe muchali bhachinyamubhili. Kulwokubha lifubha no kwikuya okubhonekana agati yemwe. Angu, mutakwikala okulubhana no mubhili, na angu, mutakulibhata lwakutyo jibheile abhana bhanu? <sup>4</sup> Kulwokubha oumwi kaikati, “Enimulubha Paulo” Oundi kaikati “Enimulubha Apolo,” mutakwikala lwa bhana bhanu? <sup>5</sup> Apolo niga? na Paulo niga? Abhakosi bha unu mwikilisishe, bhuli unu Latabhugenyi ayanile okukola. <sup>6</sup> Anye nayambile, Apolo natakoto amanji, nawe Nyamuanga nakusha. <sup>7</sup> Kulwejo, atalyati unu ayambile nolo unu ateeke amanji atana chona chona. Nawe ni Nyamuanga unu kakusha. <sup>8</sup> Woli unu kayamba na unu katako amanji bhona ni sawa, na bhuli umwi kalamila omuyelo okulubhana ne milimu jae. <sup>9</sup> Kulwokubha eswe chili bhakosi bha Nyamuanga, emwe ni migunda ja Nyamuanga, inyumba ya Nyamuanga. <sup>10</sup> Okusokana ne chigongo cha Nyamuanga chinu nayanibhwe kuti mumbaki mukulu, nateewo omusingi, no oundi nombaka ingulu yagwo. Nawe omunu nabhwe mulengelesi kutyo kombakako ingulu yae. <sup>11</sup> Kulwokubha atalio undi unu katula okumbaka omusingi ogundi okukila gunu gumbakilwe, gunu guli Yesu Kristo. <sup>12</sup> Woli, labha oumwi mwimwe kombaka ingulu yae kwa jijaabhu, Jiela, amabhui go bhugusi

bhunene, amati, obhunyasi, nolo amabhabhi,  
<sup>13</sup> omulimu gwae gulisululwa, kwo bhwelu  
bhwa mumwisi bhuliisulula. Kulwokubha il-  
isululwa no mulilo. Omulilo gulilegeja obh-  
wekisi bhwo mulimu gwa bhuli munu kutyo  
akolele. <sup>14</sup> Labha chona chona chinu omunu  
chinu ombakile chikasigala, omwene alibhona  
omuyelo. <sup>15</sup> Nawe labha omulimu gwo munu  
gukalungula kwo mulilo, atalibhona muyelo.  
Nawe omwene alichungulwa, lwakutyo kasoka  
mumulilo. <sup>16</sup> Mutakumenya ati emwe muli  
eyekalu lya Nyamuanga na ati Omwoyo gwa  
Nyamuanga gwikaye munda yemwe? <sup>17</sup> Labha  
omunu akalinyamula liyekalu lya Nyamuanga,  
Nyamuanga kamunyamula omunu uliya. Kul-  
wokubha liyekalu lya Nyamuanga ni lyelu, na  
kutyo nemwe. <sup>18</sup> Omunu atajakwijiga omwene,  
labha wona wona mwimwe ketogelati ali no  
bhwengeso ku mwanya gunu, nabhe lwo “mu-  
mumu” niwo kabha mwengeso. <sup>19</sup> Kulwokubha  
obhwengeso bhwa kuchalo chinu ni bhumumu  
imbele ya Nyamuanga, Kulwokubha jandikilwe,  
“Kakoma abho bhwengeso kubhulige lige bh-  
webhwe” <sup>20</sup> Na lindi “Latabhugenyi kamenya  
obhwiganilisha bhwa bhengeso ati ni bhutamu  
tamu.” <sup>21</sup> Kulwejo omunu ataja kwikuisha  
abhana bhanu! Kulwokubha ebhinu bhyona ni  
bhyemwe. <sup>22</sup> Labha ni Paulo, nolo Apolo, nolo  
Kefa, nolo echalo, nolo obhulame, nolo lufu, nolo  
bhinu bhinu bhilio, nolo bhinu bhilibhao. Byona  
ni bhyemwe. <sup>23</sup> nemwe muli bha Kristo na Kristo  
niwa Nyamuanga.

## Isura 4

<sup>1</sup> Kutyo nikwo omunu achibhale eswe, kuti bhakosi bhwa Kristo na bhabhiki bho bhumbise bhwe chimali cha Nyamuanga. <sup>2</sup> Kulinu, chinu echendibhwa abhabhiki bhabhe bheikanyibhwa. <sup>3</sup> Nawe kwanye anye ni chinu chitoto muno kulwokubha enilamulwa nemwe na lindi indamu yae chinyamunu. Kulwokubha nitakwilamula anye omwene. <sup>4</sup> Nitakwilamula anye omwene, inu itakubha ati anye nili mulengelesi. Ni Latabhugenyi unu kandamula. <sup>5</sup> Kulwejo, mtajaga kulamula ingulu ya lyona lyona omwanya guchali kukinga, achali kuja Latabhugenyi. Aligaleta mubhwelu amagambo ganu galiga gebhisile muchisute no kusulula obhwiganilisha bhwe mioyo. Nio bhuli munu alibhona okusimwa kwae okusoka ku Nyamuanga. <sup>6</sup> Woli, bhamula bhasu na bhayala bhasu, anye omwene na Apolo nakolele jinu ingulu yemwe. Koleleki okusoka kweswe omutula okwiigila obhugajulo bhwo bhwaiki, "Utagenda okukila kutyo jandikilwe." Inu ni kutya atalio umwi mwimwe unu kekuya ingulu yo oundi. <sup>7</sup> Kulwokubha niga unu kalola kundi agati yemwe no oundi? Niki chinu ulinacho chinu utachilamiye bhusa? Na labha ulalamiye bhusa, kulwaki omwikuya kuti mutakolele kutyo? <sup>8</sup> Mwemaliliye mnabhyo bhyona bhinu mwendaga! Mwemaliliye mwabhee no bhunibhi! Mwambile okutunga muna ebhinu okukila eswe! Chimali, enibhasabhilwa obhutungi bhakisi koleleki chitunge amwi nemwe. <sup>9</sup> Kulwejo eniikanyati Nyamuanga achitulilewo eswe jintumwa kuti kucholesha abhobhutelo



ku musitali lwabhanu bhalamuhye okuja okwitwa. Chili lwo bhuungusi kubhanyachalo, ku bhamalaika na kubhana bhanu. <sup>10</sup> Eswe chili bhamumu kunjuno ya Kristo, nawe emwe muli bhengeso kulwa Kristo. Chili bhalenga, nawe emwe muli na managa. Muna echibhalo, nawe eswe chigailwe. <sup>11</sup> Nolo omwanya gunu woli chili no mweko no bhwila, chitana ngubho, chili ne bhilonda, na lindi chitana bhwikalo. <sup>12</sup> Echikola emilimu kwa managa, kwa mabhoko geswe abhene. Chikagaywa, nichibhayana amabhando. Omwanya gunu echinyansibhwa, echikomesha. <sup>13</sup> Chikafumwa, echisubhya kwo bhwololo. Chili, nobhwiikanyo na chichabhalwa kuti chalemelwe ne chalo na kubha bhinu bhitala chibhalo ku misango jona. <sup>14</sup> Nitakwandika amagambo ganu kubhaswasha emwe, nawe okubhakanya emwe kuti bhana bhani bhendwa. <sup>15</sup> Nolo muna bheigisha makumi elefu mu Kristo, mutana bhesomwana bhamfu. Kulwokubha nabhee esomwana wemwe ku lwa Yesu Kristo okulabhila emisango jo bhwana. <sup>16</sup> Kulwejo enibhasabhwa mundubhe anye. <sup>17</sup> Eyo niyo injuno inu yakolele nimtuma kwimwe Timotheo, omwendwa wani no mwana mulengelesi ku Latabhugenyi. Alibhechukya jinjila jani mu Kristo, lwakutyo eniigisha bhuli mbala na bhuli kanisa. <sup>18</sup> Woli amwi mwimwe abhekuya, nibhakola kuti nitalija kwimwe. <sup>19</sup> Nawe nilija kwimwe omwanya gutali mulela, labha Latabhugenyi akenda. Niwo nilimenya ati gatali magambo gebhwela bhanu abhekuya, nawe nililola amanaga gebhwe. <sup>20</sup> Kulwokubha obhukama

bhwa Nyamuanga bhutali mumagambo tali mu-managa. <sup>21</sup> Omwendaki? Nije kwimwe na insimbo angu kwe lyenda no mwoyo omwololo?

## Isura 5.

<sup>1</sup> Chunguhye jinkuma ati agati yemwe munobhusiani, obhusiani bhunu bhutaliyo nolo Mubhanyamaanga. Chimenyesibhwe ati oumwi mwimwe kamama na mke semwene. <sup>2</sup> Nemwe omwikuya! Emwe mutakujubha? Unu akolele kutyo jimwingene okusoka agati yemwe. <sup>3</sup> Nolo kutyo nitali agati yemwe chimubhili nawe nili amwi nemwe chinyamwoyo, namalile kumulamula unu akolele kutyo, kuti aliga ndiwo. <sup>4</sup> Mkabhonana amwi mwisina lya Latabhugenyi weswe Yesu, no mwoyo gwani guliwao lwa managa ga Latabhugenyi weswe Yesu, <sup>5</sup> namalile kumutula omunu unu ku shetani koleleki omubhili gwae gunyamulwe, koleleki omwoyo gwae gubhone okuchungulwa mulusiku lwa Latabhugenyi. <sup>6</sup> Okwikusha kwemwe tikwakisi. Mutakumenya ati echifwimbya chitali echinyamula echilengo chona? <sup>7</sup> Mwiyoshe emwe abhene echifwibhya cha kala, koleleki mubhone kubha chilengo chiyaya, koleleki mubhe mukate gunu gutana chifwibhya. Kulwokubha, Kristo, Mwana Kondoo weswe owaipasaka amalile kubhagwa. <sup>8</sup> Kulwejo chikole olunaku lukulu lunu lutali na chifwibhya chakala, echifwibhya chajintugwa jimbibhi no bhunyamuke. Nawe chikole olumula no mukate gunu gutana chifwibhya kwo bhulengelesi ne chimali. <sup>9</sup> Nandikile munyalubha yani ati mutasasikana na bhalomesi.

<sup>10</sup> Ntana nsonga ati abhalomesi abhechalo chinu, nolo abhaligisi nolo abhasakusi nolo bhanu abhalamyamba ebhisusano kwokwikala kula nabho, kulwejo jakabheile musoke kungsi kunu. <sup>11</sup> Nawe woli enibhandikila olema okusasikana na wona wona unu katogwa mulawasu nolo muyala wasu mu Kristo, nawe nalama mubhusiyani nolo ali munu muligisi, nolo musakusi, nolo unu kalamya amasusano, nolo omufumi nolo omutamiji. Mutalya nage omunu wa intugwa eyo. <sup>12</sup> Kulwejo enifulubhenda atiki okubhahamula bhanu bhalianja ya Ikanisa? Nemwe, emwe mutabhahamuye bhanu bhali munda ya ikanisa? <sup>13</sup> Nawe Nyamuanga kabhahamula bhanu bhalianja. “Mumusoshemo omunu omubhibhi agati yemwe”

## Isura 6.

<sup>1</sup> Omwi mwimwe akabha nomusango no wejabho, natula okugenda mwibhalaja lya bhanu bhatali bhalengelesi okukila okuja imbele ya bhekilisha? <sup>2</sup> Mutakumenya ati abhekilisha bhahamula echalo? Labha mulilahamula echalo, mutakutula kulahamula amagambo ganu gatana nsonga? <sup>3</sup> Mutakumenya ati chilahamula bhahamalaika? Kwa insongaki kukila eyo, echitula okulahamula amagambo go bhulame bhunu? <sup>4</sup> Labha echitula okulahamula amagambo go bhulame bhunu, kulwaki omutula okubhahamula amalalamiko imbele ya bhanu bhatakwiamelegulu mwikanisa? <sup>5</sup> Enaika ganu kunswalo jemwe. Atalio owobhwenge umwi mwimwe owokuta emisango jibhe amwi agati yo

omuuli no muuli? <sup>6</sup> Nawe kutyo jili woli, omwikilisha umwi kaja mwibhalaja ingulu yo mwikilisha oundi, na malalamiko ago agatulwa imbele yo mulamusi unu atali mwikilisha! <sup>7</sup> Echimali nati jilio emisango agati ya bhekilisha ganu galetetele jinyanko kwimwe. Kulwaki musige okunyan-sibhwa kwa mabhibhi? Kulwaki omwikilisha okujigibhwa? <sup>8</sup> Nawe mwakolele obhunyamuke no kujiga abhandi, nabho nibhamula bhanyu na bhayala bhanyu! <sup>9</sup> Mutakumenya ati bhanu bhatali bhalengelesi bhatalilya omwandu gwo bhukama bhwa Nyamuanga? Mutekilisha olubheyi. Abhasiyani, abho abhalamya amasusano, abhalomesi, bhanu abhalosha abhalume bhejabho, <sup>10</sup> Abhefi, abhatubhe, abhamywi, abhasakusi, abhafumi, atalio agati yebhhwe unu alilya omwandu gwa Nyamuanga. <sup>11</sup> Nabho agati yebhwe aliga alimwe. Nawe mwamalile kwosibhwa, nawe mwamalile kwaulwa na Nyamuanga, nawe mwakolelwe bhalengelesi imbele ya Nyamuanga mwisina lya Latabhugenyi Yesu Kristo na kwo Mwoyo gwa Nyamuanga weswe. <sup>12</sup> “Ebhinu bhyona bhiile kwanye” nawe jitalyati bhuli chinu echinsakila. “Ebhinu bhyona bhiile kwanye,”nawe nitakutungwa nachona chona mwibhyo. <sup>13</sup> “Ebhilyo nikwainda, na inda nikwebhilyo, “nawe Nyamuanga alimalao bhyona. Omubhili gutamogelwe kulwobhulomesi, nawe gwamogelwe kulwa Latabhugenyi, na Latabhugenyi aligufulubhendela omubhili. <sup>14</sup> Nyamuanga amusuluye Latabhugenyi eswe ona alichisulula kwa managa gae. <sup>15</sup> Mutakumenya ati emibhili jemwe jigwatene

na Kristo? omutula atiki okusosha omubhili gwa Kristo mugugwatanya no musiani? Jitakutulikana! <sup>16</sup> Mutakumenya ati unu kagwatana no musiani ona abhee mubhili gumwi nage? Lwakutyo elyandiko elyaika, “Abhabhili bhalibha mubhili gumwi.” <sup>17</sup> Nawe unu kagwatana na Latabhugenyi kabha nomwoyo gumwi nage. <sup>18</sup> Mwigagane obhulomesi! Bhuli chibhibhi chinu kakola omunu nianza yo mubhili gwae. Nawe obhulomesi, omunu kakola echibhibhi ingulu yo mubhili gwae omwene. <sup>19</sup> Mutakumenya ati emibhili jemwe ni nyumba yo Mwoyo Mwelu, unu ekae munda yemwe, unu mwayanilwe okusoka ku Nyamuanga? Mutakumenya ati mutalimwe abhene? <sup>20</sup> Kulwejo mwagulilwe kwo bhugusi bhunene. Kulwejo mumulamye Nyamuanga kwe mibhili jemwe.

## Isura 7

<sup>1</sup> Okulubhana na magambo ganu nabhandikiye: Gulio omwanya guli gwa kisi omulume asige omama no mugasi wae. <sup>2</sup> Nawe kulwokusakwa kwamfu kwo bhusiani jiile bhuli mulume abhe no mugasi wae, na bhuli mugasi abhe nomulume wae. <sup>3</sup> Omulume jimwiile okumuyana omugasi wae agobhutwasi, kutyo kutyo nomugasi ona amuyane omulume wae. <sup>4</sup> Omugasi atana bhuinga ingulu yo mubhili gwae, tali omulume. Na kutyo kutyo, omulume atana bhuinga ingulu yo mubhili gwae, tali omugasi wae anabhwo. <sup>5</sup> Mutajaga kwiima mukamama amwi, tali mwikilishanyishe kwo mwanya gwakisi. Mukole kutyo koleleki

mubhone omwanya gwo kusabha. Mukamala omutula okusubhilana lindi amwi, Koleleki Shetani ataja kubhalegeja kwo kubhulwa indengo. <sup>6</sup> Nawe anaika amagambo ganu bila kulazimisha na gatali chilagilo. <sup>7</sup> Enisigombela bhuli umwi akabhee kama anye kutyo nili. Nawe bhuli munu ana echianwa chae okusoka ku Nyamuanga. Unu ana echianwa chinu, na uliya ana echianwa chilya. <sup>8</sup> Kubhanu bhatatwawe na bhatumba gasi enaikati, nijakisi kubhene ati bhakasigae bila kutwalwa, lwakutyo anye nili. <sup>9</sup> Nawe labha bhatakutula kwiganya, jibheile bhatwalwe. Kulwokubha akili okutwalwa bhataja kuligilana. <sup>10</sup> Woli kubhanu bhatwawe enibhayana echilagilo, atali anye tali ni Latabhugenyi. “Omugasi ataja kusigana no mulume wae.” <sup>11</sup> Nawe labha akasoka kumulume wae, asigale kutyo ataja kutwalwa kala jili kutyo angwane no mulume wae. Na “Omulume atamuyana omugasi wae inyalubha yo kumulema <sup>12</sup> Nawe kubhanu bhasigae, enaika anye ati, atali Latabhugenyi- ati labha alio omuili ali no mugasi atali mwikilisha na ekilisishe okwikala nage, jitamwiile kumusiga. <sup>13</sup> Labha omugasi ali no mulume unu atali mwikilisha, na labha ekilisishe okwikala nage, atamusiga. <sup>14</sup> Kumulume unu atali mwikilisha kesibhwa okulubhana ne likilisha lyo mugasi wae. No mugasi unu atali mwikilisha kesibhwa kwa insonga yomulume wae omwikilisha. Kenda bhitali kutyo abhana bhemwe bhakabhee bhatali bhelu, nawe kuchimali bhesibhwe. <sup>15</sup> Nawe atekilisishe akagenda nagende. Kulwejo,

omulawasu no muyala wasu atakubhwohya ne bhilailo bhyebhwe. Nyamuanga achibhilikiye chikale kwo mulembe. <sup>16</sup> Oumenya atiki labha omugasi, labha ulimuchungula omulume wao? Angu oumenya atiki labha omulume, alimukisha omugasi wae? <sup>17</sup> Bhuli umwi ekale obhulame lwakutyo Latabhugenyi abhagabhiye, bhuli umwi lwakutyo Nyamuanga abhabhilikiye abhene. Bhunu nibhwo obhwisombolo bhواني ku makanisa gona. <sup>18</sup> Alio unu aliga atendelwe anu abhilikiwe okwikilisha? Atalegeja okusoshao olunyamo lwo kutendwa kwae. Alio wona wona unu abhilikiwe mukwikilisha achali kutendwa? Jitamwiile kutendwa. <sup>19</sup> Kulinu abhe atendelwe nolo akabha atatendelwe chitalio chibhibhi. Chinu chili chibhibhi ni kulema okugwata ebhilagilo bhya Nyamuanga. <sup>20</sup> Bhuli umwi asigale mukubhilikilwa kwae kutyo aliga anu abhilikiwe na Nyamuanga okwikilisha. <sup>21</sup> Aliga uli mugaya omwanya gunu Nyamuanga akubhilikiye? Siga okusaswa elyo. Nawe labha outula okwitanya, kola kutyo. <sup>22</sup> Kuumwi unu abhilikiwe na Latabhugenyi kuti mugaya ni munu unu ketanya ku Latabhugenyi. Lwakutyo, oumwi unu ketanya anu abhilikiwe okwikilisha ni mugaya wa Kristo. <sup>23</sup> Mwamalile kugulwa kwo bhugusi bhunene, kulwejo mutaja kubha bhagaya bha bhanu. <sup>24</sup> Bhamula bhasu na bhayala bhasu, mubhulame bhwona bhwona bhuli umwi weswe kutyo chabhilikiwe okwikilisha, chisigale lwakutyo chili. <sup>25</sup> Woli, bhanu bhona bhachali kutwala, ntana chilagilo okusoka ku Latabhugenyi. Nawe enibhayana

obhwiganilisha bhwani kutyo bhuli. Kwe chigongo cha Latabhugenyi, jinu ejiikanyibhwa. <sup>26</sup> Kulwejo, eniganilisha kutyo kwa insonga yo kunyansibhwa, nijakisi omulume asigale kutyo ali. <sup>27</sup> Ubhoelwe no mugasi kwe chilailo cho bhutwasi? Utaja kwenda kwitanya okusoka mwicho. Uli no kwitanya okusoka ku mugasi angu uchali kutwalwa? Utayenja mugasi. <sup>28</sup> Nawe labha ukatwala, uchali kukola chibhibhi. Nalabha omugasi achali kutwalwa akatwalwa, achali kukola chibhibhi. Bado bhanu abhatwalana abhabhona jinyako jabhuli mbaga. Anye enenda nibhakishe nago. <sup>29</sup> Nawe enaikati, bhamula bhasu na bhayala bhasu omwanya ni mufuyi. Okusoka woli no kugendelela, bhanu bhali na bhagasi bhakale kuti bhatanabho. <sup>30</sup> Bhona bhanu bhajubhile bhakole kuti bhaliga bhatajubhile, na bhona bhanu bhakondelewe kuti bhatakondelewe, na bhona bhanu abhagula echinu chona chona, kuti bhachaliga kubha na chinu chona chona. <sup>31</sup> Nabhona bhanu abhafulubhenda nechalo, bhabhe kuti bhatakufulubhenda nacho. Kulwokubha ebhyainsi bhyajokinga kubhutelo bhwabhyo. <sup>32</sup> Enenda mubhe no bhwiaganyulo munyanko jona. Omulume atakutwala afulubhende ne bhinu bhinu bhimwiile Latabhugenyi, ingulu yo kumukondelesha omwene. <sup>33</sup> Nawe omulume unu atwae kafulubhendela amagambo gechalo, ingulu yo kumukondelesha omugasi wae, <sup>34</sup> aulene. Omugasi unu atatwawe amwi muyala juma unu kafulubhendela ingulu ye bhinu bhya Latabhugenyi, ingulu yo kwiyaula



kubhyomubhili no mwoyo. Nawe omugasi unu atwawe kafulubhenda ingulu ye bhinu bhya kuchalo, ingulu yo kumukondelesha omulume wae. <sup>35</sup> Enaika kutya ingulu ya libhona lyemwe, na ntatulileo omutego kwimwe. Enaika kutya kwokubha ni chimali, koleleki omutula okwitula mukolelega Latabhugenyi mutabha na chikujulo chona chona. <sup>36</sup> Nawe labha omunu keganilisha atakutula kumukolela kwa lisima omuyala juma wae, kwa insonga yo bwiganilisha bhae bhuna amanaga muno, siga atwalane nage kutyo kenda. Chitalio chibhibhi. <sup>37</sup> Nawe labha akolele obhulamusi okulema okutwala, na chitalio chinu cha bhusibhusi, na labha katula okutangasha inamba yae, kakola jansonga labha akalema omutwala. <sup>38</sup> Kulwejo, unu kamutwala omuyala juma wae kakola jabhwana, na wona wona unu kasola okulema okutwala kakola jabhwana muno. <sup>39</sup> Omugasi abhoelwe no mulume wae omwanya gunu achali kufwa. Nawe omulume akafwa, Ali no bhwiaganyulo okutwalibhwa na wona wona unu kamwenda, nawe ni mu Latabhugenyi ela. <sup>40</sup> Nchali mubhulamusi bhwani, kabha nalikondelewe enene muno akekala kutyo alila. Na eniganilisha ati anyona nino Mwoyo gwa Nyamuanga.

## Isura 8

<sup>1</sup> Woli ingulu ye bhilyo bhinu bhisosibhwe bhyanwa ku masusano: echimenya ati “Eswe bhona chili no bhwenge.” Obhwenge obhuleta echigundu, tali elyenda elyumbaka.

<sup>2</sup> Ikabhati omunu wona wona ketogelati kamenta omusango mulebhe, omunu oyo atakumanya kutyo jimwiile okumanya. <sup>3</sup> Nawe umwi wemwe akamwenda Nyamuanga, omunu oyo kamenyekana nage. <sup>4</sup> Mbe ingulu yo kulya bhilyo bhinu bhisosibhwe bhianwa ku masusano: echimenya ati “amasusano bhitali bhinu kuchalo anu,” na ati atalio Nyamuanga undi ila ni umwila.” <sup>5</sup> Kulwokubha bhali bhamfu bhanu abhabhikilwa bha mungu yakabhee nolo mulwile nolo muni, lwakutyo bhali “bhamungu na bhakulu bhamfu.” <sup>6</sup> “ Nawe kwiswe chili na Nyamuanga umwila unu ali Lata, ebhinu bhyona bhisokele kumwene, neswe chikae kumwene, na Latabhugenyi umwi Yesu Kristo, unu kumwene ebhinu bhyona bhyabheewo, na kumwene eswe chilio.” <sup>7</sup> Nolo kutyo, obhumenyi bhunu bhutali munda ya bhuli muni. nawe, abhandi abhasangila okutambila ebhisusano munsi jainyuma, nolo woli abhalya ebhilyo kuti bhisosibhwe bhianwa kumasusano. Emitima jebhwe jijigilwe kwokubha nimilenga. <sup>8</sup> Nawe ebhilyo bhitchikomesha eswe ku Nyamuanga. Eswe chitali bhabhibhi muno chikalema okulya, nolo bhakisi muno chikalya. <sup>9</sup> Nawe mubhe nobhwitegelesha ati obhwiyaganyulo bhewemwe bhutaja kubha chikujulo kuunu ali mulenga mulikisha. <sup>10</sup> Ebu iganilishati omunu akulola, awe unu uli no bhwenge, nulya ebhilyo mwi yekalu lya masusano. Omutima gwo muni oyo gutakulamula ona alye ebhinu bhinu bhisosibhwe bhianwa bhya masusano? <sup>11</sup> Kulwejo ingulu yo bhumenyi bhawo bhwe chimali ingulu

yo bhwambilo bhwe bhisusano, mulwasu na muyala wanyu unu ali mulenga, unu ona Kristo afuye ingulu yae, kasimagisibhwa. <sup>12</sup> Kulwejo, ukamenya ebhibhibhi ingulu yo mumula wanyu na bhayala bhanyu no kujijimya emitima jebhwe jinu jili milenga, omukola ebhibhibhi ingulu ya Kristo. <sup>13</sup> Kulwejo, bhikabha ebhilyo nibhikola okwikujula kwa bhamula bhasu na bhayala bhasu, ntakulya nyama kata, koleleki ntaja kumukola omula wasu no muyala wasu okugwa.

## Isura 9

<sup>1</sup> Anye ntali mwibhule? Anye ntali ntumwa? Anye ntamulolele Yesu Latabhugenyi weswe? Emwe mutali matwasho ge milimu jani ku Latabhugenyi? <sup>2</sup> Ikabhee ati labha anye ntali ntumwa kubhandi, akilimo ndi ntumwa kwimwe. Kulwokubha emwe nemwe echibhalikisho cha obhutumwa bhwani mu Latabhugenyi. <sup>3</sup> Bhunu nibhwo obhubhalikisho bhwani kubhanu abhambusilisha anye. <sup>4</sup> Angu chitana kwikilisibhwa okulya no kunywa? <sup>5</sup> Chitana kwikilisibhwa okugega omugasi unu ali mwikilisha lwakutyo abhakola jintumwa ejindi, na bhaili bha Latabhugenyi, na Kefa? <sup>6</sup> Angu nanyela na Barnababhanu jichiile okola emilimu? <sup>7</sup> Nigaunu kakola emilimu kuti musilikale neliila omwene? Niga unu kayamba omujabhibhu nasiga okulyako amatwasho gendeko? Angu niga unu kalebha liijo nasigwa okunywa amata gajo? <sup>8</sup> Angu enaika ganu kwo bhuinga bhwa bhanu? Ebhilagilo bhita kwaika ganu? <sup>9</sup> Kulwokubha jandikilwe mubhilagilo bhya Musa, “utabhoya omunwa ing'a

omunwa anu eilebha obhunyasi.”Nichimali ati anu Nyamuanga kaikilila jing'a? <sup>10</sup> Angu atakwaika ago ingulu yeswe? jandikilwe ingulu yeswe, kulwokubha omwene unu kalima obhulo jimwiile alime kwo kwiikanya, na unu kagesa jimwiile agese kwo kwokwiikanya kwo kusangangila okugesu. <sup>11</sup> Labha chayambile ebhinu bhya mumioyo agati yemwe, Angu nimusango munene kweswe chikagesa ebhinu bhya mubhili okusoka kwimwe? <sup>12</sup> Ika bha abhandi bhwabhwene obhulengelesi bhunu okusoka kwimwe, Angu eswe chitakukila abho? Nolo kutyo, chiataisabhile obhulengelesi obhwo. Tali, chekomesishe kumagambo gona nchisiga kubha chikujulo kwe misango jobhwana eja Kristo. <sup>13</sup> Mutakumenyati bhona bhanu abhakola emilimu mwi yekalu abhabhona ebhilyo okusoka mwi yekalu? Mutakumenyati bhona bhanu abhakola emilimu muchigabhilo abhabhona olubhaju lwa chinu chisosibhwe muchigabhilo? <sup>14</sup> Kulwainsonga eyo eyo, Latabhugenyi alagiliye ati bhona bhanu abhalasha emisango jo bhwana nibhusibhusi bhekale okusokana nayo. <sup>15</sup> Nawe nchali kubhatonga obhulengelesi bhona bhunu. Nantakwandika ganu koleleki musango gwona gwona gukolekane ingulu yani. Niakili anye nifwe okusiga munu wona wona okuindula enu nekuya ingulu yani. <sup>16</sup> Okubha nakabhee nindasha emisango jo bhwana, ntana njuno yo kwikuya, kulwokubha nibhusibhusi jinyiile nikole kutyo. Jilimbona anye ndilema okulasha emisango jo bhwana! <sup>17</sup> Kulwokubha nikakola kutya kwokwisosha kwani, nili no

muyelo. Nawe ikabha itali kwokwisosha, nichali no mulimu gunu nayanilwe okubha mutangasi. <sup>18</sup> Mbe omuyelo gwani niki? Ati nilalashaga, enisosha emisango jo bhwana kulihya uli nokukolela kwo bhulengelesi bhwani bhunu ninabhwo mumisango Jo bhwana. <sup>19</sup> Kulwa insonga nili no obhwanya, nakolelwe okubha mugaya wa wa bhuli munu, koleleki nibhabhone bhafu muno. <sup>20</sup> Kubhayaudi nekoshaga kuti nili Muyaudi, koleleki nibhabhone Abhayaudi. Kubhanu bhaliga emwalo ye ebhilagilo, nekoshaga kuti nili emwalo ye ebhilagilo koleleki nibhabhone bhanu bhali emwalo ye ebhilagilo. Nakolele ejo nolwo kutyo anye omwene naliga mutali emwalo ye ebhilagilo. <sup>21</sup> Kubhanu bhali anja ye ebhilagilo, naliga nili lwa abhene anja ye ebhilagilo, nawe anye naliga nitali anja ye echilagilo cha Nyamuanga, tali nili emwalo ye echilagilo cha Kristo. Nakolele kutyo koleleki nibhabhone bhanu bhali anja ye ebhilagilo. <sup>22</sup> Kubhalenga nabhaga mulenga, koleleki nibhabhone abhalenga. Naliga nili wa mbala jona kubhanu bhona, koleleki munjila jona nitule okuchungula abhandi. <sup>23</sup> Anye enikola who jona kulwa injuno ya Omusango gwe Kisi, koleleki nibhengilwa amwi na amabhando. <sup>24</sup> Mbe mutakumenya ati akatungu kokubhilimyanya bhanu abhasindana abhabhuma jintambi, nawe unu kalamila likusho ni umwi? Kulwejo mubhume jintambi koleleki mubhone likusho. <sup>25</sup> Omwenyi wobhwenywa kejibhila amagambo gona akabha ali mumeigisho. Abho abhakola kutyo koleleki bhabhone likusho linu elinya-

muka, nawe eswe echibhilima koleleki chibhone likusho linu litakunyamuka. <sup>26</sup> Kulwejo anye nitakubhilima bhila njuno amo ati enibhuma infune kuti enibhuma omuyaga. <sup>27</sup> Tali eninyasha omubhili gwani ningukola nko omugaya, koleleki nikamala okulasisha abhandi, anye omwene nasiga okulemwa.

## Isura 10

<sup>1</sup> Bhamula bhasu na bhayala bhasu enenda mumenye jinu kutya, bhalata bheswe bhaliga bhali emwalo ye elile na bhona nibhalabha munyanja. <sup>2</sup> Nibhabhatijibhwa bhabhe bha Musa munda ye elile na munda ya inyanja, <sup>3</sup> ka bhona bhaliye ebhilyo bhiliya ebhyo omwoyo. <sup>4</sup> Ka bhona bhanyweye amanji galiya ago omwoyo. Kulwokubha bhanyweye okusoka kwitale elyo omwoyo linu lyabhalubhaga, na litale elyo lyaliga lili Kristo. <sup>5</sup> Nawe Nyamuanga atakondelesibhwe nabhafu, ne emitumbi jebhwe jalalile ibhara. <sup>6</sup> Mbe ago gona galiga gali bhi-jejekanyo kwiswe, koleleki eswe chasiga kubha bhanu bha inamba yokwenda amabhibhi lwakutyo abhene bhakolele. <sup>7</sup> Mwasiga okulamya ebhisusano, lwa kutyo abhandi bhaliga bhali. Jinu jili lwakutyo jandikilwe, “Abhanu bheyanjile ansi nibhalya no okunywa, nibhemelegulu okubhina na inamba yo obhusiani.” <sup>8</sup> Chitakola obhusiani lwa abhandi kutyo bhakolele. Lunaku lumwi abhanu bhiumbi makumi gabhili na bhasatu nibhafwa kulwa injuno eyo. <sup>9</sup> Chasiga okumusaka Kristo, lwa abhandi kutyo bhakolele nibhanyamulwa na jinjoka. <sup>10</sup> Ka

ona mwasiga okulukuma, lwakutyo abhandi ona bhalukumile nibhanyamulwa na malaika wo olufu. <sup>11</sup> Mbe amagambo lwago gakolekene lwe ebhijejekanyo kwiswe. Nigandikwa koleleki gachionye - bhanu chakingiwe na jinsiku jobhutelo. <sup>12</sup> Kulwejo bhuli munu unu kelola ati emeleguyu emenye asiga kugwa. <sup>13</sup> Litaliwo esakwa linu lyabhabhwene lili egenyi ku bhana bhanu. Nawe Nyamuanga nimulengelesi. Atabhasiga mukasakwa okutambuka indengo yemwe. Amwi na lisakwa elyo, omwene alibholesha omulyango gwo okutulamo, koleleki mubhone okwikomesha. <sup>14</sup> Kulwejo, bhendwa bhani, mulibhilime lilamya lye ebhisusano. <sup>15</sup> Enaika nemwe lwa abhanu bho obhwenge, koleleki mulamule ingulu ya linu enaika. <sup>16</sup> Echikombe cha libhando chinu echibheleleka, bhutali ubhwikofyanya bhwa amanyinga ga Kristo? Omukate guliya echibhegaga, bhutali obhumwi bhwo omubhili gwa Kristo? <sup>17</sup> Kulwokubha omukate ni gumwi, eswe abhafu chili mubhili gumwi. Eswe bhona echilamila mukate gumwi chili amwi. <sup>18</sup> Mulole abhanu bha Israeli: Enibhusa, bhanu bhona abhalya echitambo bhatali amwi kubhigabhilo? <sup>19</sup> Mbe enaika chinuki? Ati echisusano ni chinu chinu chikobhele? Amo ebhilyo bhinu bhisosibhwe kubhisusano ni chinu chinu chikobhele? <sup>20</sup> Nawe enaikilila ingulu ye ebhinu bhinu abhasosha Abhanyamaanga bhili bhyanwa, lwakutyo abhasosha ebhinu ebhyo kumasambwa ntikwo mu Nyamuanga. Anye nitakwenda emwe mugwatane na amasambwa! <sup>21</sup> Mutakutula okunywela

echikombe cho Omukama necha amasambwa. Mutakutula okubha no obhumwi kumeja yo Omukama na kumeja ya amasambwa. <sup>22</sup> Ati chitamuyana Omukama libhubha? Echimukila amanaga? <sup>23</sup> “Ebhinu bhyona ebhikilisibhwa,” nawe bhitakondele bhyona. “Ebhinu bhyona ebhikilisibhwa,” nawe bring bhyona bhinu ebhyumbaka abhanu. <sup>24</sup> Atalio nolwo na umwi unu akalondele amakonde gaye enyele. Okusiga ago, bhuli munu akalondele amakonde agowejabho. <sup>25</sup> Omutula okulya bhuli chinu chinu echigusibhwa musokoni obhutabhushabhusha kwa injuno yo omwoyo. <sup>26</sup> Kwo kubha, “echalo ni mali yo Omukama na bhyona bhinu bhilimo.” <sup>27</sup> Unu atalimwikilisha akabhakoka kwilya, na mukenda okugenda, mulye chona chona echo kabhayana, mutabhusha amabhusho ago omwoyo. <sup>28</sup> Nawe omunu akabhabhwila ati, “ebhilyo bhinu bhisokene me ebhiyanwa bhya abhapagani,” mutalya. Okubha jinu ejisasa unu abhabhwila kutyo, na kulwa injuno yo omwoyo gwaye. <sup>29</sup> Anye nitakwaikilila emyoyo jemwe, tali omwoyo gwo oundi uliya. Kulwokubha kubhaki obhwanya bhulamulwe no omwoyo gwo omunu undi? <sup>30</sup> Labha anye enilya nokusima, kubhaki nifumilwe echinu chinu namalile okuchisima? <sup>31</sup> Kulwejo, chonachona chinu omulya amo okunywa, amo chonachona chinu omukola, mukole gona kulwa injuno ya likusho lya Nyamuanga. <sup>32</sup> Mutaja okuyabhisha Abhayaudi amo Abhayunani, amo likanisa lya Nyamuanga. <sup>33</sup> Mulegeje lwakutyo anye enilegeja okukondelesha abhanu bhona ku mag-



ambo gona. Nitakulonda okwiyendeja anye omwene, tali enendeja abhafu. Enikola ejo kutyo koleleki bhabhone okuchunguka.

## Isura 11

<sup>1</sup> Mundubhilishe anye, lwakutyo anye enimulubhilisha Kristo. <sup>2</sup> Olyanu enibhakuya kulwa kutyo omunyichuka ku magambo gona. Enibhakuya kulwa kutyo mugwatile a ijadi lwakutyo nailetele kwimwe. <sup>3</sup> Mbe enenda mumenye kutiya, Kristo ni mutwe gwa bhuli mulume, ko omulume ni mutwe gwo omugasi, na kutyo jili Nyamuanga ni mutwe gwa Kristo. <sup>4</sup> Bhuli mulume unu kasabhwa amo unu kasosha obhulagi aswikiliye omutwe kaswasha omutwe gwaye. <sup>5</sup> Nawe omugasi unu kasabhwa amo nasosha obhulagi omutwe gwaye guli abhwelu kaswasha omutwe gwaye. Okubha kasusa kuti amwegelwe. <sup>6</sup> Akasanga omugasi ataswikiliye omutwe gwaye, amwege jimfwili Jaye jibhe mfuyi. Jikabha jili nswalo omugasi okutema amo okumwega jimfwili jaye, mbe aswikilile omutwe gwaye. <sup>7</sup> Kubhaki jiteile omulume okuswikilila omutwe gwaye, kulwokubha omwene ni chijejekanyo na likusho lya Nyamuanga. Nawe omugasi nikusho lya omulume. <sup>8</sup> Kulwokubha omulume atasokene no omugasi. Tali omugasi asokene no omulume. <sup>9</sup> Nolwo jitalyati omulume amogelwe okujuna omugasi. Tali omugasi amogelwe ajune omulume. <sup>10</sup> Inu niyo insonga omugasi jimwiile okubha no olunyamo lwo obhuinga ingulu yo omutwe gwaye, kulwa injuno yo bhuinga <sup>11</sup> Kulwejo, Kulata

bhugenyi, omugasi atakubha enyele akabha atalio omulume, nolwo omulume ona nikwo kutyo jili. <sup>12</sup> Okubha lwakutyo omugasi asokele kumulume, nyabhuliko omulume ona asokele kumugasi. Ne ebhinu bhyona ebhisokaga ku Nyamuanga. <sup>13</sup> Mbe mulamule emwe abhene, Nibhabhushe, nijakisi omugasi okusabhwa Nyamuanga omutwe gwaye guli abhwelu? <sup>14</sup> Mbe nolwo obhusimuka ona bhutabheigisha lwakutyo omulume akabha na jimfwili ndela ejimuswasha? <sup>15</sup> Ko obhusimuka bhutakubheigisha ati omugasi akabha na jimfwili ndela nikusho kumwene? Kulwokubha ayabhwile jimfwili ndela lwe echifwalo chaye. <sup>16</sup> Nawe omunu wonawona akabha nenda okubhambala ingulu yo omusango gunu, eswe chitali na bhutulo bhundi, nolwo amakanisa ga Nyamuanga ona gatakutula. <sup>17</sup> Kubhilagilo bhinu anu, nitakubhakuya. Kulwokubha mukekofyanya, mutakubhona mugaso tali omubhulwa chonachona. <sup>18</sup> Kulwokubha enungwa ati, oungwa mwekofyanya mwikanisa, umubha umutasikene, na enikilishanya nejo kutoto. <sup>19</sup> Kunsonga nibhusi bhusi bhubheo obhuyombo agati yemwe, koleleki bhanu bhakilisibhwe bhamenyekane kwimwe. <sup>20</sup> Kwolokubha mukekofyanya, echo omulya bhitali bhilyo bhyo Omukama. <sup>21</sup> Ungwa mwalya, bhuli munu kalya ebhaye wenyele nibhelabhila abhandi bhachali kulya, nolwo oundi ali no momweko, oundi atamilile. <sup>22</sup> Mtali na nyumba ejo kulilamo nokunywelamo? Mbe omuligaya likanisa lya Nyamuanga nokubheta emitima bhanu bhatali na chinu? Emwe nibhab-

hwileki? Nibhakuye? Nitabhakuya kulwo omusango gunu! <sup>23</sup> Kulwokubha nalamiye okusoka Kumukama echo nabhayana emwe, lwakutyo Omukama Yesu, ingeta iliya bhejile bhamulila iniku, agegele omukate. <sup>24</sup> Ejile amala okusima, nagubheganya naika ati, “Gunu nigwo omubhili gwani, guliwo kulwa injuno yemwe. Mukolega kutiyo mukenda okunyichuka.” <sup>25</sup> Munjila eyo bhejile bhamala okulya nagega echikombe, naika ati, “Echikombe chinu ni mulago omuyaya mu manyinga gani. Mukolega kutyo kwiya ngendo Nyafu mukasanga ni munywa, koleleki munyichuke.” <sup>26</sup> Mukasanga nimulya no okunywela Echikombe chinu, omulasha olufu lwo Omukama okukingila ao alijila <sup>27</sup> Kulwejo, bhuli munu unu kalya omukate nokunywela Echikombe echo Omukama atambukile amalagililo, alibha eyumbakiye echikayo cho omubhili na amanyinga ago Omukama. <sup>28</sup> Omunu nambe okwikesesha omwene okwamba, niwo alye no okunywela echikombe. <sup>29</sup> Kulwokubha unu kalya no okunywa atagajue omubhili, kalya no okunywa indamu yaye omwene. <sup>30</sup> Inu niyo injuno abhanu bhafu agati yemwe ni bhalwaye na nibhalenga, na abhandi agati yemwe bhafuye. <sup>31</sup> Nawe chikekengela abhene chitaligwa mundamu. <sup>32</sup> Tali chikalamulwa no Omukama, echigonyibhwa, koleleki chasiga okulamulwa amwi ne echalo. <sup>33</sup> Kulwejo, bhamula na bhayala bhasu, mukekofyanya okulya, mulindililane. <sup>34</sup> Akasanga omunu ali nainjala, alye ika owaye, koleleki mukekofyanya amwi mutakola kutyo

kwa indamu. Na ingulu ya amagambo agandi ganu mwandikile, nilibha naja nilibhasombolela.

## Isura 12

<sup>1</sup> Ingulu ye ebhiyanwa bhye emyoyo, bhamula na bhayala bhasu nitakwenda mubhulwe okusombokelwa. <sup>2</sup> Omumenya lwa kutyo ao mwaliga muli bhapagani mwatangasibhwaga ne ebhisusano bhinu bhitakuloma, munjila jona jona jabhatangashaga. <sup>3</sup> Kulwejo, enenda mumenye kutya ataliwo wonawona unu kaika kwo Omwoyo gwa Nyamuanga naika ati, “Yesu afumilisibhwe.” Ataliwo wonawona unu alyaika ati, “Yesu ni Mukama,” atali okusokelela Mwoyo Mwelu. <sup>4</sup> Mbe bhiliwo ebhiyanwa bhya bhuli mbaga, tali Mwoyo Mwelu ni ulya ulya. <sup>5</sup> Okufurubhenda kulio kwa bhuli mbaga, tali Omukama ni ulya ulya. <sup>6</sup> Kajilio emilimo ja bhuli mbaga, nawe Nyamuanga unu kakola emilimo jona mubhanu bhona niwoyo oyo ela. <sup>7</sup> Mbe bhuli munu kayabhwa okuswelulilwa kwo Mwoyo kulwo omugaso gwa bhanu bhona. <sup>8</sup> Kulwokubha omunu umwi ayabhilwe no Mwoyo omusango gwo obhwengeso, koundi nayabhwa omusango gwo obhumenyi okusoka ku Mwoyo ogwo gwo ela. <sup>9</sup> Ku undi Mwoyo namuyana elikilisha, ku undi Mwoyo namuyana echiyana echokuosha. <sup>10</sup> Oundi namuyana ebhikolwa bhya amanaga, no oundi okusosha obhulagi. Koundi namuyana obhutulo bhwo okugajula emyoyo, oundi namuyana obhutulo bhwokumenya jindimi, koundi okubhutabhuta

jindimi. <sup>11</sup> Nawe Mwoyo niwe unu kakola emilimu jona jinu, okuyana bhuli munu echiyana okwingana lwakutyo kasola omwene enyele. <sup>12</sup> Kunsonga lwakutyo omubhili ni gumwi, ka gugwatene ne ebhilungo bhyafu, ebhilungo bhyona bhili kumubhili gumwi, na nikwo kutyo jili na ku Kristo. <sup>13</sup> Kunsonga mu Mwoyo umwi eswe bhona chabhatijibhwe okubha mubhili gumwi, bhabhe Abhayaudi amo Abhayunani, chibhe bha bhagaya amo abhatwale, na bhona chanywesibhwe Mwoyo umwi. <sup>14</sup> Kunsonga omubhili gutali ebhala limwi, tali ni bhyafu. <sup>15</sup> Labha okugulu kukaika ati, “kulwokubha anye nitali kubhoko, anye nitali ebhala elyo omubhili,” okwaika kutyo kutakuganya okubha ebhala lyo omubhili. <sup>16</sup> Ka labha okutwi kukaika ati, okubha anye nitali liso, mbe anye nitali ebhala lyo okubhili,” obhwaiki obhwo bhutakuganya kusige okubha ebhala elyo omubhili. <sup>17</sup> Labha omubhili gwona gukabha liso, mbe okungwa kwakabeye aki? Labha omubhili gwona gukabha kutwi, mbe okuunyilisha kwakabeye aki? <sup>18</sup> Nawe Nyamuanga amogele bhuli chungo echo omubhili nachitula ao endele omwene. <sup>19</sup> Na chisanga bhyona bhili chungo chimwi, omubhili gwakabheye aki? <sup>20</sup> Kulwejo oli ebhyungo ni bhyafu, nawe omubhili ni gumwi. <sup>21</sup> Mbe eliso litakutula okubhwila okubhoko ati, “nitali na mulimo nawe.” Nalwo omutwe gutakutula okubhwila amagulu ati, “nitali na mulimo nemwe.” <sup>22</sup> Nawe ebhungo bhyo omubhili bhinu ebhibhonekana okubha ne echibhalo chitoto bhili nemilimo minene. <sup>23</sup> Ne ebhungo

ebhyo omubhili bhinu echitoga ati bhili ne echibhalo chitoto, echibhiyana echibhalo chafu. <sup>24</sup> Na ebhungo bhye ekisi mumeso bhitakusubha kuyabhwa echibhalo, kulwokubha bhyamalile okubha ne echibhalo. Nawe Nyamuanga abhitee amwi ebhungo bhyona, nokubhiyana echibhalo chafu bhinu bhitali na chibhalo. <sup>25</sup> Akolele kutyo koleleki bhwasiga kubhao obhutagani mumubhili, koleleki ebhyungo bhyona bhibhike kulwokwenda kwo omunu omwi. <sup>26</sup> Akatungu echungo chimwi chikautala, ebhungo bhyona nibhyasha. <sup>27</sup> Mbe emwe oyanu muli mubhili gwa Kristo, ne ebhungo bhuli chimwi chwimwi kulubhala lwacho chigwatene na Kristo. <sup>28</sup> Mbe Nyamuanga mwikanisa ateyeo echokwamba jintumwa, echakabhili abhalagi, echakasatu abhalimu, okwiya bhanu bhona abhakola ebhikolwa ebhikulu, okwiya echiyana ebhyo okuoshwa, bhanu abhasakila, bhanu abhakola omulimu gwo ukutangasha, na bhona bhanu abhamenya jindimi eja bhuli mbaga. <sup>29</sup> Mbe eswe bhona chili ntumwa? Eswe bhona chili bhalagi? Eswe bhona chili bhalimu, Mbe eswe bhona echikola ebhikolwa ebhyo okulugusha? <sup>30</sup> Enibhusya, eswe bhona chili ne chiyana echo okuwosha? Eswe bhona echisimula kunyaika? Eswe bhona echigajula inyaika? <sup>31</sup> Munomuno nimulonde ebhiyana ebhinene. Anyone nilibholesha injila eyobwana kukila jona.

## Isura 13

<sup>1</sup> Chaike ati enaika kwa jinyaika ja bhana munu ne jabhamalaika. Mbe nawe nikabha

nitana kwenda, nili lwe chuma chinu echilila amwi lwa jindege jinu ejimwaya. <sup>2</sup> Na ati nili ne chiyanwa cho bhulagi no bhumenyi bhwe chimali bhunu bhwiibhisile no bhwengeso, ati nine likilisha elyo kufulula amabhanga. Mbe nawe nikabha nitana kwenda, kwanye chitali chinu. <sup>3</sup> Na chaike ati nolwo nikasosha omugabho gwani gwona no kubhalisha abhagasi, nolwo ati nikagusosha omubhili gwani koleleki nochibhwe omulilo. Mbe nawe nikabha nitana kwenda, nitakubhonamo chinu. <sup>4</sup> Okwenda okwingumilisha na kuli ne chigongo. Okwenda kutakwikuya amwi kwikusha. kutana chigundu <sup>5</sup> amwi bhulagi-lagi. Kutakuyenja misango jakwo, kutakubhona bhinyiga bhwangu, nolwo kutakubhala mabhibhi. <sup>6</sup> Kutakukondelwa mu bhunyamuke. Amwi nejo, okukondelelwa ne je chimali. <sup>7</sup> Okwenda okwigumilisha masango gone; Okwikilisha misango jone, kuli no bhubhasi mu misango jone, no kwikomesha mu misango jone. <sup>8</sup> Okwenda kuwana bhutelo. Alabha bhukabha bhuli bhulagi, Bhwona bhulichweka. Alabha jikabha jilio jinyaika, jiliwao. Alabha bhukabha bhulio bhwengeso, bhulio. <sup>9</sup> Kulwo kubha echimenya kwe ebhala na echikola kwo bhulagi kwe ebhala. <sup>10</sup> Mbe nawe ilibha yaja inu ikumiye, ilya inu itakumiye iliwao. <sup>11</sup> Anu naliga nichali mwana kutiyo, neganilishaga lwo mwana kutiyo, naliga nindamula lwo mwana kutiyo. Nejile nakula nabha munu mukulu, ningata kula amasango ge chitoto. <sup>12</sup> Kulwo kubha woli echilolela mwilole, kuti chitakwilola kisi chilio echisute, mbe nawe omwana gulya chililolana

obhusu kwo obhusu. Woli enimenya lubhala, mbe nawe mu mwanya gulya nilimenya muno lwa kutyo anye one enimenyekana muno. <sup>13</sup> Mbe nawe woli mu misango jinu esatu ejigendelela: Elikilisha, no kwenda. Mbe nawe chinu chili chikulu kukila ganu gone nu kwenda.

## Isura ya 14.

<sup>1</sup> Mulubhega okwenda no kwenda muno ebhiyanwa ebhya mu Mwoyo, nawe kukilao muno mubhone okusosha obhulagi. <sup>2</sup> Kulwo kubha mwenene unu kaika mu nyaika atakwaika na bhanu nawe kaika Nyamuanga. Kulwo kubha atalio unu kamenya kunsonga kaika emisango jinu jiselekele mu Mwoyo. <sup>3</sup> Mbe nawe omwene unu kasosha obhulagi, kaika na bhanu no kubhombaka, no bhasimbagilisha, no kubhasilisha. <sup>4</sup> Omwene unu kaika mu nyaika keyumbaka omwene, mbe nawe unu kasosha obhulagi kalyumbaka likanisa. <sup>5</sup> Woli enenda ati emwe bhone mwaike mu nyaika. Mbe nawe kukilao ejo jone, enenda ati musoshega obhulagi. Unu kasosha obhulagi ni mukulu kukila unu kaika mu nyaika (mbe nawe abheo owokugajula), koleleki ati likanisa libhone okumbakwa. <sup>6</sup> Mbe nawe woli, mumula wasu na bhayala bhasu, nikabhajako kwo kwaika kwa inyaika yo lulimi lundi, okubhakomesha chinuki emwe? Nitakutula, atali enaika nemwe mu njila yo kuswelulilwa amwi mu njila yo bhengeso, amwi mu bhulagi, amwi mu njila ya ameigisho. <sup>7</sup> Ikabha ebhinu bhinu bhitana bhuinga lwo



lukuli amwi litungu bhikalema okusosha obhulaka bhunu bhutasikene, ebhumenyekana atiki ati chinu ni chinu-ki chinu echenywa? <sup>8</sup> Kulwo kubha ikabha linyawegona likasosha obhulaka bhunu bhutakumenyekana, okulubhana naki omunu kamenya ati omwana gunu nigwo kwiikanya lilemo? <sup>9</sup> Nkokutyo nemwe. Mukasosha kwo lulimi omusango gunu gutali abhwelu, ni kulubhana naki omunu kamenya chinu omwaika? Omutula okubha nimwaika, mbe nawe atalio unu katula okubhelelwa. <sup>10</sup> Kutaliwo kwitimata ati jilio inyaika nyafu mu ndimi nyafu nyafu muchalo, na italio nolwo imwi inu itana nsonga. <sup>11</sup> Mbe nawe alabha nitakumenya nsonga ya jinyaka, enibha mugenyi ku mwene ku unu kaika, na unu kaika kabha mugenyi kwanye. <sup>12</sup> Nikwo kutyo nemwe. Kulwo kubha mukenele muno okulola okubhulisibhwa okwa Mwoyo, mwende ati mwongeshe muno okulyumbaka likanisa. <sup>13</sup> kwibhyo, unu kaika kwa jinyaika na nasabhwe koleleki ayanwe okugajula. <sup>14</sup> Kulwo kubha nikasabhwa mu nyaika, omwoyo gwani one ogusabhwa, mbe nawe obhwenge bhwani bhitana matwasho. <sup>15</sup> Nikole-ki? Enisabhwa kwo Mwoyo gwani, mbe nawe one enisabhwa kwo bhwenge bhwani. Enimba kwo Mwoyo gwani, na enimba kwo bhwenge bhwani one. <sup>16</sup> Kujindi jone, ukamukuya Nyamuanga kwo Mwoyo, omwene unu ali mugenyi ketabhwa atiki "Amina" Anu ousosha isime, na akabha atakujimenya jinu owaika? <sup>17</sup> Kulwo kubha ni chimali ati awe wasima kisi, mbe nawe oundi uliya atakum-

bakwa. <sup>18</sup> Enimusima Nyamuanga kulwo kubha enaika mu nyaika nyafu kukila nemwe bhone. <sup>19</sup> Mbe nawe mwikanisa ni akili naike misango etanu kwo bhumenyi bhwani koleleki nibhone okubheigisha abhandi, kukila okwaika misango bhiumbi ekumi mu nyaika. <sup>20</sup> Bhamula bhasu na bhayala bhasu, mwasiga kubha bhana bhatoto mu kwiganilisha kwemwe. Amwi nejo, okulubhana no bhunyamuke, nimubhe lwa bhana abhalela. Mbe nawe mu kwiganilisha kwemwe mubhee bhanu bhakulu. <sup>21</sup> Jandikilwe mu bhilagilo ati, “Mu bhanu bha nyaika indi na mu minwa eja bhagenyi nilwaika na bhanu bhanu. Nolwo kutyo bhatalinyungwa,” kaika Latabhugenyi. <sup>22</sup> Kwibhyo, jindimi ja jinyaika ni chibhalikisho, mbe nawe atali kubhanu bhekilisishe, nawe ku bhanu bhatekilisishe. Mbe nawe okusosha obhulagi ni chibhalikisho, atali ku bhanu bhatekilisishe, nawe ni ingulu yebhwe ya bhanu bhekilisishe. <sup>23</sup> Mbe, likabha likanisa lyona likofyanyishe amwi na bhona nibhaika mu nyaika indi, bhagenyi na bhanu bhatekilisishe one bhengiyemo, angu bhatakutula okwaika ati bhanu ni bhasasi? <sup>24</sup> Mbe nawe akabha bhona nimusosha obhulagi na unu atekilisishe amwi mugenyi engiyemo, kakongibhwa nejo kongwa. kalamulwa nejo ejaikwa. <sup>25</sup> Jimbisike jo Mwoyo gwaye jakasuluywe. Mukubhonekana kwaye, akaguye bhwifumbike no kumulamy Nyamuanga. Na akekilisishe ati Nyamuanga ali agati yemwe. <sup>26</sup> Woli ni chinuki chinu echilubha, bhamula na bhayala bhasu? Ungwa mukabhugangana amwi, bhuli umwi ali no lwimbo lwo

kusilisha, anameigisho, ano kuswelulilwa, ali no lulimi lundi, amwi okugajula. Nimukole bhuli chinu koleleki ati mulyumbake likanisa. <sup>27</sup> Alabha wone wine kaika mu lulimi lundi, bhabheo bhanu bhabhili amwi bhasatu, na bhuli umwi nibhabhalanwa. No munu ni bhusi-bhusi agajule chinu echaikwa. <sup>28</sup> Mbe nawe alabha atalio munu wo kugajula, mbe bhuli umwi webhwe enyanje ajibhile jibhi mwikanisa. Mbe bhuli umwi aike enyele-la na ku Nyamuanga. <sup>29</sup> Na bhalagi bhabhili amwi bhasatu bhaike, na abhandi bhategeleshe no kusombokelwa chinu chaikwa. <sup>30</sup> Mbe nawe unu enyanjile no kuswelulilwa no musango mu bhufubhendi, unu saga naika najibhile. <sup>31</sup> Kulwo kubha bhuli umwi wemwe katula okusosha obhulagi oumwi akamala oundi nalubha koleleki ati bhuli umwi atule okwiigila na bhone bhatule okusimbagilisibhwa. <sup>32</sup> Kulwo kubha emyoyo ja bhalagi jili emwalo yo bhwangalisi bhwa abhalagi. <sup>33</sup> Kulwo kubha Nyamuanga atali Nyamuanga wo bhunyamuke, mbe nawe wo mulembe. Lwakutyo jili mu mwikanisa gona aga bhakilisha, <sup>34</sup> kubheile abhagasi bhenyanje mukanisa nibhajibhila jibhi. Kulwo kubha bhatakwikilisibhwa okwaika. Amwi nejo, kubheile bhabhe bhololo, lwa kutyo one ebhilagilo ebhyaika. <sup>35</sup> Alabha chilio chone chone chinu abhenda okwiigila, mbe nibhabhabhushe abhalume bhebhe ika. Kulwo kubha ni nswalo omugasi okuloma mwikanisa. <sup>36</sup> Angu omusango gwa Nyamuanga gusokele kwemwe? Nangu gubhakingiye emwe-la? <sup>37</sup> Nolwo omunu

akelola ati ni mulagi amwi we chinyamwoyo, jimwiile ajimenye emisango jinu enibhandikila ati ni malagililo aga Latabhugenyi. <sup>38</sup> Mbe nawe akalema okumenya jinu, mumusige abhao. <sup>39</sup> Kwibhyo woli, bhamula na bhayala bhasu, mwende muno okusosha obhulagi, na mwasiga kumuganya munu wone wone unu kaika kwa jindimi ejindi. <sup>40</sup> Mbe nawe emisango jone jikoleke kwo bhwekisi na kwo bhwiti.

## Isura ya 15.

<sup>1</sup> Woli enibhechukisha, emwe bhamula bhasu nemwe bhayala bhasu, ingulu yo musango gwo bhwana gunu nabhasimuliye, inu emwe mwaitamiye no kuimeleguluko. <sup>2</sup> Ni ku musango gwo bhwana gunu mwakisibhwe, alabha mukagugwata omusango nimugumililako lwa kutyo nabhasimuliye emwe, atali ati mwekilisishe kutyo-ela. <sup>3</sup> Alabha okwamba lwa kutyo nailamiye kunsonga lwa kutyo nailetele kwemwe ili: ati okulubhana na maandiko, Kristo afuye kulwa ingulu ye bhibhibhi bhyeswe, <sup>4</sup> okulubhana na maandiko nasikwa, na ati nasuluka ku lusiku lwa kasatu. <sup>5</sup> Na ati namusolomokela Kefa, okumala bhaliya ekumi na bhabhili. <sup>6</sup> Okumala nabhasolomokela kwo mwanya gumwi emwe bhamula bhasu nemwe bhayala bhasu kukila ngendo magana gatanu. Abhafu bhebhwewe bhachali bhamaanga, mbe nawe abhandi bhebhwewe bhaongee ntilo. <sup>7</sup> Okumala namusolomokela Yakobho, okumala jintumwa jone. <sup>8</sup> Kubhutelo bhwa gone, nansolomokela anye, lwa kutyo omwana kebhulwa omwanya guchali

kukinga (ndebhile). <sup>9</sup> Kulwo kubha anye nili mutoto ku Ntumwa. Niteile okubhilikilwa intumwa, kunsonga nalinyasishe likanisa lwa Nyamuanga. <sup>10</sup> Mbe nawe kulwe chigongo cha Nyamuanga nilio lwa kutyo nili, ne chigongo chaye kwanye chaliga chitali cha kutyo-ela. Kukila ejo, nakolele kwa managa kukila bhone. Mbe nawe aliga atali anye, nawe ni chigongo cha Nyamuanga chinu chili munda yani. <sup>11</sup> Kulwejo alabha nanye amwi bhenene, mbe echisimula kutyo na echikilisha kutyo. <sup>12</sup> Woli alabha Kristo asimuywe kuti unu asulukile mu bhafuye, ejibha atiki abhandi bhyemwe bhaike ati bhutalio bhusuluko bhwa bhafuye? <sup>13</sup> Mbe nawe alabha bhutalio bhusuluko bhwa bhafuye, mbe nolwo Kristo one atasulukile. <sup>14</sup> Na alabha Kristo atasulukile, kwibhyo obhusimusi bhweswe ni bhwa kutyo-ela ne likilisha lyemwe one ni lwa kutyo-ela. <sup>15</sup> Na echibhonekana kubha ati bhabhambasi bho lulimi okulubhana na Nyamuanga, kunsonga chamubhambaliye Nyamuanga mubhutasikene, okwaika ati amusuluye Kristo, kenu atamusuluye. <sup>16</sup> Alabha abhafuye bhatakusululwa, Yesu one atasuluywe. <sup>17</sup> Na alabha Kristo atasuluywe, elikilisha lyemwe no lwa kutyo-ela na muchali mu bhibhibhi bhyemwe. <sup>18</sup> Nolwo kutyo bhaliya bhanu bhafuye mu Kristo one bhasimbagilisha. <sup>19</sup> Akabha kwo bhulame bhunu bhwenyele chili no bhuyali kwo mwanya gunu oguja mu Kristo, abhanu bhone, eswe chili bho kusalwa kukila bhanu bhone. <sup>20</sup> Mbe nawe woli Kristo asulukile okusoka mu bhafuye, amatwashi go kwamba agabhanu bhafuye. <sup>21</sup> Kulwo

kubha olufu lwejile nilulabha ku munu, one okulabha ku munu obhusuliko bhwa abhafuye. <sup>22</sup> Kulwo kubha ku Adamu bhone abhafwa, nikwo kutyo one mu Kristo bhone abhakola kubha bhamaanga. <sup>23</sup> Mbe nawe bhuli umwi mu bhikolwa bhyaye: Kristo, amatwashi go kwamba, no okumala bhalya bhanu bhali bha Kristo abhakolwa kubha bhaanga mu mwanya gwo kuja kwaye. <sup>24</sup> Niwo bhulibha obhutelo, anu Kristo alibhayana obhukama bhwa Nyamuanga Lata. Jinu anu niwo alisimagisha obhukama bhwone no bhutunge bhwone na amanaga. <sup>25</sup> Kulwo kubha ni bhusi-bhusi atunge Kulinga anu akatelelo abhasoko bhaye bhona emwalo ye bhigele bhyaye. <sup>26</sup> Omusoko wa kubhutelo okunyamulwa niwe lufu. <sup>27</sup> Kulwo kubha “Ateyewo bhuli chinu emwalo ye bhigele bhyaye.” Mbe nawe unywa niyaikwa “Ateyewo bhuli chinu,” Na abhwelu ati inu itakusangisha bhaliya bhanu bhateyewo ati bhuli chinu emwalo yaye omwene. <sup>28</sup> Mu mwanya ebhinu bhyona bhiteywewo emwalo yaye, okumala omwana omwene katelwao emwalo yaye unu abhiteyeo ebhinu bhyona emwalo yaye. Gunu gulibhonekana koleleki ati Nyamuanga Lata abhe bhyona mu bhyona. <sup>29</sup> Amwi one abhakola-ki bhaliya bhanu bhabhatijibhwe ingulu ya bhafuye? Alabha abhafuye bhatakusululwa chimi, kulwa -ki lindi abhabhatijibhwa ingulu yebhwe? <sup>30</sup> Na ni kulwa -ki chili mu ntambala bhuli mwanya? <sup>31</sup> Bhamula bhasu na bhayala bhasu, mu kwikuya kwani kwimwe, jinu nili najo mu Kristo Yesu Latabhugenyi weswe, enilasha kutya:

enifwaga kusiku. <sup>32</sup> Ejinsakilaki, mukulola kwa bhana-munu, akalabha nalwanile na jintyanyi jinsiku eyo Efeso, alabha abhafuye bhatasululwa? “Siga woli chilye na chinywe, kulwo kubha mutondo echifwa.” <sup>33</sup> Mwasiga kujigwajigwa: “Amaijo mabhibhi aganyamula Jintumwa je kisi. <sup>34</sup> Mubhe no kwibhalilila! Nimulame mu bhulengelesi! Nimusige okugendelela okukola ebhibhibhi. Kulwo kubha abhandi bhemwe mutana bhumenyi bhwa Nyamuanga. Enaika kutya nibhaswashe emwe. <sup>35</sup> Mbe nawe munu undi alyaika ati, “Abhafuye abhasululwa kutiki? Na bhene bhalija na mibhili gwa mbikaki?” <sup>36</sup> Awe uli mumumu muno! Chiliya chinu ouyamba chitakutula kukula atali chifwe okwamba. <sup>37</sup> Na chiliya ouyamba gutali mubhili gunu ogukula, nawe ni njuma inu iletele omutenga. Eitula okubha ili ingano amwi chinu chindi. <sup>38</sup> Mbe nawe Nyamuanga kaiyana omubhili kutyo Kenda, na bhuli njuma mubhili gwayo gwenene. <sup>39</sup> Mbe emibhili jona jitakususana. Atali, guliwo omubhili gumwi ogwa abhanu, no omubhili ogundi ogwa jityanyi, no mubhili ogundi ogwa jinyonyi, no ogundi ingulu ya jinswi. <sup>40</sup> One jiliwo emibhili ja Mulwile ne mibhili ja muchalo. Mbe nawe likusho lye mibhili ja Mulwile ni ja mbika umwi na likusho lya muchalo one ni lindi. <sup>41</sup> Liliwo likusho limwi elya lisubha, na liliwo likusho elindi elyo kwesi, na liliwo likusho elindi elya jinjota. kulwo kubha injota eimwi itasikene na jinjota ejindi mwikusho. <sup>42</sup> Nikwo kutyo one bhuli no bhusuluko bhwa bhafuye. Chinu echiyambwa echinya-

muka, na chinu echimela chitakunyamuka. <sup>43</sup> Chiyambilwe mu bhikolwa bhyo bhusimuka, nichimelela mwikusho. Nichiyambwa mu bhulenga, nichimelela mu managa. <sup>44</sup> Chiyambilwe mu mubhili gwo bhusimuka, nichimelela mu mubhili gas chinyamwoyo. Alabha guliwo omubhili gwo bhusimuka, guliwo omubhili gwo Mwoyo one. <sup>45</sup> Kwibhyo one jandikilwe ati, “Omunu wo kwamba Adamu akolelwe omubhili gunu obhulaka.” Adamu wo bhutelo akolelwe omwoyo gunu ogusosha obhuanga. <sup>46</sup> Mbe nawe owe chinyamwoyo atejile okwamba atali owo bhusimuka, no kumala owe chinyamwoyo. <sup>47</sup> Omunu wo kwamba ni wa kuchalo, akolelwe kwo liteli lwa amwi. Omunu wa kabhili oyo asokele mu Mulwile. <sup>48</sup> Lwa kutyo uliya akolelwe kwo liteli lwa ansi, nikwo kutyo one bhaliya bhanu bhakolelwe kwo liteli lwa ansi. Lwa kutyo omunu wa Mulwile ali, nikwo kutyo one bhaliya abha Mulwile. <sup>49</sup> Lwa kutyo chigegele echijejekanyo cho munu wo liteli lwa ansi, echigege one echijejekanyo cho munu wa Mulwile. <sup>50</sup> Woli enibhabhwila, bhamula bhasu na bhayala bhasu, ati omubhili na insagama bhitakutula okulya omwandu obhukama bhwa Nyamuanga. Nolwo obhwo kunyamuka okulya omwandu bhunyantanyamuka. <sup>51</sup> Lola! Enibhabhwila emwe imbisike ye chimali: chitalifwa bhona, nawe bhona chiliindulwa. <sup>52</sup> Chiliindulwa mu mwanya, kuliwo kutema-tema kwe liso, ku linyawegona elya kubhutelo. Kulwo kubha linyawegona lililila, na abhafuye bhalisuka bhatana mibhili jo kunyamula,



na chiliindulwa. <sup>53</sup> Kawoli gunu ogwo kunyamuka ni bhusi-bhusi gufwale gunyatanyamuka, na gunu ogwo kufwa ni bhusi-bhusi gufwale gunyantafwa. <sup>54</sup> Mbe nawe mu mwanya gunu ogwo kunyamuka gukafwala bhunyantanyamuka, na gunu ogwo kufwa gukafwala bhunyantafwa, Niwo ilija inyaika inu yandikilwe ati, "olufu lwamilwa no bhuigi." <sup>55</sup> "Olufu, obhuigi bhawo bhulya- ki? Olufu, obhululu bhawo bhulya- ki"" <sup>56</sup> Obhululu bhwo lufu ni chibhibhi, na managa ge chibhibhi ni chilagilo. <sup>57</sup> Mbe nawe isime ku Nyamuanga, unu kachiyana eswe obhuigi okulabha ku Latabhugenyi weswe Yesu Kristo! <sup>58</sup> Kulwejo, abhendwa bhamula bhasu na bhayala bhasu, nimulume musimbagiliye na mwasiga kutingisika. Nsiku jona nulole emilimu ja Latabhugenyi, kunsonga mumenyele ati emilimu jemwe mu Latabhugenyi jitali ja kutyo- ela.

## Isura ya 16.

<sup>1</sup> Woli okulubhana no bhusolosa ingulu ya bhekilisha, lwa kutyo nalagiliye amakanisa aga Galatia, nikwo kutyo kubheile okukola. <sup>2</sup> Mu lusiku olwo kwamba ku bhwoyo, bhuli umwi kwimwe atulewo echinu chilubhe kumbali no kuchibhika kutyo omutula. Mukole kutyo koleleki ati kwasiga kubhawo okusolosa mu mwanya gunu enija. <sup>3</sup> Na nakakinge, wona wona unu mwakasole, enimutuma amwi na inyalubha okusosha ebhiyanwa bhyemwe eyo Yelusalemu. <sup>4</sup> Alabha jili kisi kwanye okugenda one, abhagenda amwi nanye. <sup>5</sup> Mbe nawe enija kwemwe, mu mwanya gunu nakalabhe mu

Makedonia. Kulwo kubha onilabha mu Makedonia. <sup>6</sup> Amwi enitula okwinyanja nemwe amwi nolwo okumalawo jinsiku ja imbeyo, koleleki ati mutule okunsakila mu lugendo lwani, wona wona enu enija. <sup>7</sup> Kulwo kubha nitakenele kubhakumanya woli kwo mwanya mufuyi gunu. Kulwo kubha eniikanya okwinyanja nemwe kwo mwanya mufuyi, alabha Latabhugenyi akanyikilisisha. <sup>8</sup> Mbe nawe eninyanja Efeso Kuinga Pentekoste, <sup>9</sup> Kulwo kubha omulyango omufunde gwegukile ingulu yani, na bhaliwo bhasoko bhafu bhanu abhana. <sup>10</sup> Woli mu mwanya Timotheo akaja, mumulole ati ali nemwe kubhaya -uli, kakola emilimu ja Latabhugenyi, lwa kutyo one enikola. <sup>11</sup> Omuu wona wona asiga kumugaya. Mumusakile mu mulugendo lwaye olwo mulembe, koleleki ati anyijeko. Kulwo kubha enimulindilila aje amwi na bhasu. <sup>12</sup> Woli okulubhana no wasu Apolo. Namukomesishe no kumutamo omwoyo muno okubhalibhatila emwe amwi na bhasu. Mbe nawe atendele kuja kwa woli. Nolwo kutyo, kajokuja akabhona okwamba. <sup>13</sup> Nimutengeje, mulumega mwasiga kutela-tela, nimukole kuti bhalume, nimubha na managa. <sup>14</sup> Mbe gona ganu omukola gakoleke mu lyenda. <sup>15</sup> Muimenyele inyumba ya Stefana. Mumenyele ati bhaliga bhali bhekilisha bho kwamba eyo Akaya, na ati bheteeyo abhene mu bhufubhendi bhwa abhekilisha. Mbe woli enibhelebelesha, bhamula bhasu na bhayala bhasu, <sup>16</sup> nimubhe bhololo ku bhanu lwabho, na ku bhuli muno unu kasakila mu milimu na abhakosi bhe milimu amwi neswe. <sup>17</sup> Na

enikondelwa mukuja kwa Stefano, Fotunato, na Akiko. Bhomeleguyu anu emwe mwiile okubha. <sup>18</sup> Kulwo kubha bhagukondelesha omwoyo gwani no gwemwe Kulwejo woli, mubhamenye abhanu kuti bhanu. <sup>19</sup> Amakanisa ga Asia abhabhakesha emwe. Akila na Prisika abhabhakesha mu Latabhugenyi, amwi na likanisa linu lili ika ewabho. <sup>20</sup> Abhamula bhasu na bhayala bhasu bhona abhabhakesha. Muke-shanyega kwo kunyunyana okwelu. <sup>21</sup> Anye, Paulo, enandika kutya kwo kubhoko kwani. <sup>22</sup> Alabha alio wona wona unu atakumwenda Latabhugenyi, mbe okwiimwa kubhe ingulu yaye. Latabhugenyi weswe, ija! <sup>23</sup> Echigongo cha Latabhugenyi Yesu chibhe nemwe. <sup>24</sup> Okwenda kwani kubhe amwi nemwe mu Kristo Yesu.

**Kara Bible**  
**The New Testament in the Kara language of Tanzania**  
copyright © 2020 Door43 World Missions Community

Language: Kikara (Kara)

Translation by: Door43 World Missions Community

Contributor: CHRISTOPHER COSTANTINE, Cloud Roman, Denis, ELIADA MUKARUKA, Eliada Mkaluka, REV. BULIRO, REV. MULANGI, Thereza, VAILET, Vaireth, Tedy Ssemakweli

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2020-10-06

---

PDF generated using Haiola and XeLaTeX on 22 Feb 2024 from source files dated 31 Aug 2023

207ad1ee-cbe5-556b-8c15-0a069573c830